

Regional News Unit AIR Aizawl
Saturday, April 13, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Lok Sabha inthlanpui hmachhawn mekah political party ten theihtawp chhuahin vote an zawng mek.
- Mizoram Truck Owners' Association chuan Governor Hari Babu Kambhampati hnenah an harsatnate an thlen.
- Election Commission chuan Lok Sabha inthlah thawh khatna atana inbuatsaihna Election Observer-te a thlirpui.
- India chuan a khua leh tuite chu Iran leh Israel-a zin rih lo turin a hriattir.

<><><>

JAIRAM RAMESH

Congress hruaitu hlun, Rajya Sabha MP Jairam Ramesh chuan tun Lok Sabha inthlan hi Indiaa mipui rorelna tunnun anih zel theihna tura inthlan pawimawh a ni a ti.

Nimina Aizawla Congress Manifesto a tlangzarhnaah he thu hi sawiin Pu Jairam ramesh-a chuan India ramah Democracy a bo mai loh nan leh chawinun a nih zel theih na thawh a ngai a ti, India Dampui vawn him a pawimawh a ti bawk.

India ram chu hnam hrang hrang, sakhaw hrang hrang awm khawmna a ni a, a bikin hmarchhak bial pheih chu chi bil leh hnam hrang hrang tamna a ni a, hemi humhim tur hian Congress party chuan nasa takin a thawk a ni a ti.

Forest Conservation Act pass tak khan Mizoram te ang, state te tak te ah ramngaw nasa taka tih chereuna a thlen dawn a ni a ti bawk.

Tun inthlanah hian Congress Party chu dikna chi 5 ah a inngat tih a sawi a, chungte chu Hmeichhiate dikna, Thalaite Dikna, Loneitute Dikna, Nitin inhlawhchawpa eizawng te dikna leh khawtlanga a hnuaihning te dikna a ni a, an dikna leh chanvo humhalh turin Congress Party chu nasa takin a thawk a ni a ti.

Tun Lok Sabha Inthlanah hian political Party 28 thawhhona INDIA block chu a chak ngei a beisei tih a sawi a ni,

<><><>

BJP PRESS CONFERENCE

BJP Mizoram hruaitute chuan Congress hotuten BJP chu Kristiante nuai chimih tumtu tia tawngkam an chhakchhuak fo chu thalo an tih thu an sawi.

Nimin khan Aizawl Press Club a chanchimbu mite hmaah he thu hi sawiin BJP Mizoram thupuangtu Pi Lalremsangi Fanai chuan BJP chu Secular paihbo tum tu, UCC kalpui tumtu, Article 370 lakkian chungchang sawi zawm a Mizo mipuite sawithaihna tawngkam an chhakchhuak fo chu Mizoram BJP chuan thalo a ti hle a ni, a ti a.

All India Congress Committee (AICC) chuan tun thla ni 5 khan Lok Sabha Election Campaign Manifesto tlangzarhin, “Kan ti ang” tih intiamna hrang hrang point 300 chuang an ziaak a, hengah hian Congress Party in sakhaw zalenna- Secular a dah pawimawh tur emaw, Secular tih sawirikna pakhatmah hmuh tur a awm lo a ni, an ti.

He hunah vek hian BJP hruaitute chuan CAA chu hman a nih pawhin North East Tribal te a huam dawn lo an ti a, hei vang hian Meghalaya Lok Sabha MP Agatha Sangma, Mizoram Lok Sabha MP Pu Lalrosanga te pawhin Bill thlawp zawng in Vote an pe ta a ni, an ti a. FOREIGN CONTRIBUTION REGULATION ACT (FCRA) 2010 pawhsawilangin FCRA chu India rama Kristian te chauh emaw Mizoram NGO te chauh tihtawp anga sawiduh an awm thin thu leh FCRA fimkhur zawka kalpuina hian India ram chung NGO zawng zawngte a huam a ni, an ti.

Mizote zingah Mizoram State Special Provision Art 371G pawh lak bo mai hlauhawm leh him lo tia insawithawih fo pawh insawithaihna awmze nei lo a ni an ti.

<><><>

GOVERNOR

Mizoram Truck Owners’ Association hotute chuan Governor Hari Babu Kambhampati chu Raj Bhavan-ah nimin khan an hmu a, an harsatnate an thlen a ni.

He hunah hian Mizoram Truck Owners’ Association hotute chuan Bairabi rel station-a rel lut leh chhuak mumal lo tak avanga harsatna an tawh chungchante chu Governor hnenah an thlen a. MTOA hruaitute chuan member 150 vel an nih thu sawiin an pawlah hian truck 300 bawr an inziaklut tih an sawi.

Bairabi railhead atanga Mizoram hmun hrang hranga buhfai dahkhawlna hmunah Buhfai phurh sak turin FCCI Contractor-te hnuaiyah an inhlawh tih an sawi a. Tun dinhmunah rel luh leh chhuah dante a mumal lo hle a. Hei vang hian MTOA hruaitute te chuan Truck neituten harsatna nasa tak an tawh mek tih Governor hnenah hian an thlen a, Bairabi Station chuan hmunhma, hmanrua leh thawktute a neih that tawh loh avangin hmun chep takah truck tam tak inhnawkhawm a ngai tih an sawi. Hei vang hian a hun takah bungruate an hlan thlak theih loh phah thin a ni an ti a. He an harsatna te sutkian a nih theih nan Governor chu Railways hotute leh FCCI hotute biaksak turin an ngen a ni.

Governor chuan MTOA hruaitute thu thlen leh an harsatna tawh chungchante a ngaihthlak hnuin a tul anga hmalakpui a tum tih a sawi a, MTOA lam pawh General Manager, North-East Frontier Agency (NEFA), Guwahati chu hmu turin thurawn a pe a, recommendation letter a ziahsak nghal bawh a ni.

<><><>

ZPM

Lok Sabha MP inthlan lo awm tura ZPM Candidate Richard Vanlalhmangaiha chuan MNF Party te'n tu emaw hmanruaah hmangan dawihzep takin midang phen atangin an nei nia sawiin, midang phen atanga bei lo in FIR thehlut sela, a diklo a nih chuan Zoram mipuiten an vote lo mai ang a ti a, thlan tlin a nih chuan mihring leh Pathian hmaah eiru lo tura a intiam thu a sawi.

He thu hi nimin khan Lunglei-ah Street campaign ah a sawi a, Richard Vanlalmangaiha chuan naupangte a nih laiin hnamdang ho zingah amah chiah naupang a awm tih sawiin, mizo naupang hmuhsita a awm loh nan huaisen chhuahin an thu thu in a awm ngai lo a ti a. Tunah a tak takin Mizoram aizawh turin hnamdang rual zinga che tla leh turin MP Candidate a lo ni ta a, Mizoram aiawhtu tu nih ngei pawh a chak hle tih a sawi a ni.

<><><>

MNF

Lok Sabha inthlan atana campaign mek Pu K. Vanlalvena chuan Darzo, Hnahthial, Thiltlang, Pangzawlte leh Chhiahtlangte tlawhin thu a sawi a.

Mipui candidate Pu K.Vanlalvena chuan MP (LS) ah thlan tlin anih chuan hmalakna tam tak awm tur zingah a ngaih pawimawh hmasak tihhlawhtlin ngei a tumte a sawi a. Mizo thalaite eizawna dapsak chungchang te, buh leh bala intodelh tura kut hnathawktute dinhmun chawisan te, ranvulh tute tana hmalakna tur te, border trade chungchang te chu a hna pui ber tur a nih thu a sawi. Mizoram tana a hmalakna hrang hrangte tihhlawhtlin theihna tur chuan central sorkar leh ZPM sorkar pawh tha takin a thawhpui ang, a ti.

Zoram thalai rual lehkha thiam leh thiamlote eizawna a ngaih pawimawhia sawiin, India ram leh khawvel hmun hrang hrangah company leh hnathawhna hmun hrang hrangah an luh theih nan nasa takin a bei ang a ti a. Sports lam kaihnawihah thalaite tan eizawna tlak hna a tam tawh em em a, Mizo thalai tam takin eizawna atan an hman theih nan hma a la ang a, hei hi a ngai pawimawh em em a ni, a ti.

Mizorama kut hnathawktute thawh chhuah tlemzia hian a rilru a tih nat thin thu a sawi a. Buh leh bal, thlai hrang hrang chingtu te, sawhthing, oil palm, aieng, hmunphiah, hmarcha chingtute tan minimum price support ngaihtuhsak ngei a tum bawk. Parliament session-ah Mizoram, Arunachal leh Nagaland ah oil palm hralhna a chhe lutuk a, kg ah Rs 10 aia tlem lova hralh a rawt chu a hlawhtling a, session leh hunah a aia sanga an hralh leh theihna turin rawtna a thlen leh ang a ti.

<><><>

CONGRESS MP CANDIDATE

Lok Sabha inthlan lo awm turah Congress party MP candidate Pu Lalbiakzama nimin khan Kolasib Press Club-ah chanchinbumite kawm in, inthlan an hmachhawn mek chu tualchhung politics a inbeihna mai mai ang ani lova, sakhua a him leh him loh chungchanga inbeihna ani, a ti a, tun inthlan ah hian BJP leh a sangawizawnpui te hian sorkarna an chang leh anih chuan India ramah Democracy hi a chhia in, Democracy a awm a ring tawh lo, a ti.

Congress MP candidate chuan, BJP kaihhruai sorkar hnuaiah Dan hnuaia intluk tlanna chu a awm tawhlo tluk ani a, sorkar laipui thuneitute chuan CBI leh ED te chu an mahni do thei deuha an ngaihte man tir in, thubuai an siam sak a, a then chu Jail-ah khungin, che thei lova siam chu an hna pui ber ani hial tawh, a ti a, India ram ah Hnam tenau leh Kristian te an chep sawt em em a, India ram in zalenna hlu tak a neih thin chu a bo zel ani, a ti.

He hunah hian MPCC President Pu Lal Thanzara chuan, ram, hnam leh sakhua a him theihna tura theihtawp chhuahtu Congress party MP candidate Pu Lalbiakzama chu vote theuh turin Vote nei zawng zawngte a sawm a, Mizorama political party pahnih, MNF leh ZPM te chu Chanchintha hrilhna daltu lama Parliament ah thu tur annih avangin ngaihtuah na fim tak pu in vote loh ngam a tul, a ti a, ZPM candidate in Parliament ah a thutna tur a sawi chiang theilo chu mipuite bum tumna ni a hriat thu sawiin, vanduaithlak a tih a sawi bawk.

Chanchinbumite zawhna chhangin, MPCC President chuan, tunhnaia MPCC hruaitu inthlanna in an party chhungah a thalo zawngin nghawng a neih aiin an that phah zawk ni a a hriat thu leh, inthlanna a a vanduai zawkte chu party ah nihna leh chanvo an in vuah kim ni a a hriat thu a sawi a, pheikhai rual takin tun inthlanah pawh an Campaign ho tih a sawi bawk.



ELECTION COMMISSION HOLDS ELECTION OBSERVERS MEETING

Lok Sabha inthlan thawh khatna atana inbuatsaihna thlirletin Election Commission chuan Election Observer-te thutkhawm a ko.

Election Commission chuan ram puma Inthlan vilvengtu Election Observer 350 chuangte chu a thutkhawmpui a. Lok Sabha inthlan thawh khatnaah hian state 21-a Parliament bial 102-ah April ni 19 khian vote thlak a ni dawn a ni. Inthlan thawh khatnaah hian felfai taka vote thlak a nih theihna turin general duty 127, police 67 leh expenditure observer 167 ruahman an ni.



HARYANA CS ISSUES STRINGENT DIRECTIVE

Haryana Chief Secretary TVSN Prasad chuan civil leh police thuneitute chu ni 10 lo awm tur chhunga anmahni district theuhva school bus-te chu rintlak leh chak tha a ni em tih enfiah vek turin a hriattir.

Ningani khan Haryana Mahendragarh district-a Unhani khuaah naupang chuanna bus a chesual a, sikul naupang 6 an thi a. Midang 15 an hliam bawk a ni.

Hemi chungchangah hian nimin khan Chief Secretary chuan thutkhawm hmanhmawh a ko a. State chhunga school bus-te chu enfiah vat turin thupek a chhuah ta a ni.



PRESIDENT EXTENDS GREETINGS TO NATION ON FESTIVALS

President Droupadi Murmu-i chuan April ni 13 leh ni 14-a hman tur kut chi hrang hrang - Vaisakhi, Vishu, Bishub, Bahag Bihu, Poila Boishakh, Vaishakhadi leh Puthandu atan ram mipuite duhsakna a hlan.

President chuan ram puma kuthnathawkte thawhrimna chu chhuahawm a tih thu a sawi a. Heng kut-te hian mitin nunah hlawhtlinna leh muanna thlen se a duh thu a sawi a ni.



EXTERNAL AFFAIRS MINISTRY ADVICE CITIZEN NOT TO TRALVEL IN IRAN AND ISRAEL

India chuan boruak a ralmuan rih loh avangin a khua leh tuite chu thu leh awm hma atan Iran leh Israel-a zin rih lo turin hriattirna a chhuah

External Affairs Ministry-in a sawi danin, tuna Iran leh Israel-a India mi awm mekte pawh Indian Embassy-a inziaklut tur leh an thu leh hla ngaichang tura chah an ni a. An sahimna tura kaihhruaina zawm tur leh an che chhuak a nih pawhin a tlem thei ang bera pawn chhuak tura thurawn pek an ni.

<><><>